



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : Tir Yimiyim

tiryimiyim@aolima

tir yimiyim

TAPAK 8

Pakistan-i India ama Russia dang totzü malitet: Imran Khan

Alex Baena-i Valverde anema police nem tashishiba agütsütsü



VOL. XX NO. 178 (ADOK 178) DIMAPUR SANGTENNÜ (TUESDAY)

RONGCHII (APRIL) 11, 2023

₹ 5.00

AAP nem 'national party' status agütsür TMC & NCP nungi 'national party' agiener

New Delhi, April 10, 2023 (Agencies):

Election Commission of India (ECI)-i Hombarnü national aser state political party tem jenjang meyipa repringshidang Delhi chief minister Arvind Kejriwal-i aniba Aam Aadmi Party (AAP) nem national party status agütsüo.

ECI-isa Sharad Pawar-i aniba Nationalist Congress Party aser West Bengal chief minister Mamata Banerjee-i aniba Trinamool Congress dak nungi national party jenjang agiogo.

"AAP-i election nung shilem agiba meyipa repringdang Gujarat assembly election nung parnoki total vote nungi 12.92% angu. Iba ajanga Gujarat nung state party asütsü temsüogo aser Delhi, Goa o Punjab nungbo recognised state party ka lir" ta ECI-i ashi.

Political party ka nem national status agütsüba nung tajangzük aika lir aser itemji state balala nung common party symbol, elections mapang public broadcasters nung free airtime angur aser New Delhi nung party office atema tawa angur.

AAP ya 2012 küm tentet aser yaküm tetenzüklen Punjab assembly elections nung takok angu aser iba sülen Gujarat elections nunga menden 5 nung

Congress nung adentsü ayongzüker

Kohima, April 10, 2023 (TYO):

Naga political system ya senotsü aser rongsen aginüba nung tera yanga lir aser iba ajanga ochimashi aser tejak repringtepba mapa inyaker, anungji temelenshi bener arutsüba mapa nung Congress nung adentsü ayongzüker ta Nagaland Congress-i metetdaksüo.

Tawa tasen shimba Nagaland Pradesh Congress Committee (NPCC) president S. Spongmeren Jamir-i iba tayongzükba agütsü.

Nagaland state ngur küm 60 buba lir aser Naga nung wadang ajak nung tejakleni aruogo, ta pai ashi.

"Asen state tejakleni aoba atema nüma atanger ajisüaka asen tangatetba samaba angudang temulung raksar. Asenoki ochi, akhüm aser ka akümba tangatetbatem samadaksüo" ta Spongmeren-i ashi.

Mapang ka oboula nung nungi angazükba tesayuba tajungtem Nagaland nung bensi saka tangbo political system nung rongsen dang bushiba ajanga ochimashi aser tejak repringtepba agi süngogo, ta

takok angu.

ECI-i Hombarnü temelenshi masüdag national parties 8 tashi EC nung züngsema liasü. Party temji Bharatiya Janata Party (BJP), Congress, TMC, Bahujan Samaj Party (BSP), Communist Party of India (CPI), CPI (Marxist), NCP aser National People's Party (NPP) liasü.

Hombarnü ECI-i NCP dak nungi national party status agienogo. Goa, Manipur aser Meghalaya nung EC-i state party status agien saka Nagaland nungbo state party ta recognized süogo.

TMC-ia Bengal aser Tripura nung dang state party status nung alitsü. TMC nungi national party status agienogo aser Manipur o Arunachal Pradesh nung recognised state party masü.

Lok Janshakti Party (Ram Vilas) ya Nagaland nung state party ka ta recognized süogo aser yamaji Meghalaya nung Voice of the People's Party aser Tripura nung Tipra Motha Party recognized süogo.

Uttar Pradesh nung Rashtriya Lok Dal, Bengal nung Revolutionary Socialist Party aser K Chandrashekar Rao-i aniba Bharat Rashtriya Samiti (Telangana Rashtriya Samithi) teloktem recognised party masü kümogo.

paisa ashi.

Iba ajanga Constitution of India kübok nübor tenzüksü tezüngzüktep agiba ajak mezüngmeshir. Iba khuret ajanga sorkar ketdangsubaren nung tetsükdaksü agütsür aser ibaji 14 buba Nagaland Legislative Assembly ajanga sayur. Iba ajanga political system nung ali rongsen penpuba kuli agütsür, ta NPCC president-isa metetdaksü.

"Naga nungeri asen tangatetba yanglushitsüla aser temelenshiji tanü mena aliba MLA temi masü saka asenoki bener arutsüla. Alizüng aser teinyaknüba aliba lanurtem, state rongsenketzung ajungketer entrepreneurs, teküpoktiba jenjang nung aliba nübortem shirnok Naga loktiliba tongtired lir, NGOs aser Civil Societies ajanga iba temelenshiji bener arutsüla" ta Spongmeren-isa ayongzük.

"Asenok ajak ka küma longiemtsüla. Naga lennirtemi sabang ka adenshitsüla aser ola adoktsü tasü aittsüla" ta paisa ashi.

Kasa tangatetba aliba nübortem Congress nung denang aser temelenshi bener aruba nung shilem agitsü ayongzüker, ta NPCC president-isa ashi.

Nagaland nung nisung 2 dak COVID-19 putet

Kohima, April 10, 2023 (TYO): Nagaland nung April 10, 2023 nü nisung ana dak COVID-19 aliba putetogo.

Hombarnü Wokha district nung COVID-19 putet. Tena züngsema Nagaland nung nisung 35,991 dak Covid putetogo ta Department of Health and Family Welfare nung Integrated Disease Surveillance Programme (IDSP)-i metetdaksü.

Covid puteter nisung 35,991 nungi nisung 33,690 taneptsü

nguogo, 782 asü (5 non covid deaths) aser nisung 1,517 tanga state temi ao, ta parnokisa metetdaksü.

April 6, 2023 nü Kohima nung nisung ka dak COVID-19 puteta liasü saka April 9 nü iba nisung ya taneptsü anguba osang metetdaksü.

India nung Hombarnep 8:00 ako tashi tesüiba ghonda 24 tsüngda nisung 5,880 dak COVID-19 putet ta Union health ministry-i metetdaksü.

Kasa ghonda 24 tsüngda Covid puteta alir nisung 14 asü. Delhi o Himachal Pradesh nung nisung pezüzü, Kerala nung 2 aser Gujarat, Jammu & Kashmir, Maharashtra o Rajasthan nung kaka asü.

Nisung 5,880 dak putetba züngsema India nung nisung 4.47 crore (4,47,62,496) dak Covid putetogo. Iba nungi nisung 4,41,96,318 taneptsü nguogo, ta Union health ministry-isa ashi.

Swachh Bharat Mission atema sen tim mesüi agütsü: CAG

Dimapur, April 10, 2023 (Agencies):

2018-19 financial year nung Dimapur division kübok Public Health Engineering (PHED) department ajanga Swachh Bharat Mission (Gramin) asoshi lemzüksüba sen tim mesüi amshi ta Comptroller and Auditor General (CAG) of India-i putetba osang metetdaksüo.

Public Health Engineering (PHED) department indang Executive Engineer nem Swachh Bharat Mission atema Rs 5.01 crore lemzüksüba nungi Rs 90.54 lakh tim mesüi agütsü ta CAG-i ashi.

Solid and Liquid Waste Management (SLWM) nung Drainage, waste collection depot, dustbins aser wheel carts yanglutsü atema Rs 4.03 crore lemzüksü ta CAG report nung shia lir.

Department-i Rs 2.53 crore ajanga kilentzü ayimdak 6,540 metres (m) yangluba shia lir. Iba asoshi cash books, work orders, running account bills (RA Bills), measurement books aser tanga kulitem repringba nung lungro amshia kilentzü ayimdak 4,665 m yanglu aser March 2019 nung tembang ta shia lir. Junior Engineer (JE), PHED ajanga MBS nung iba mapa inyaker aser March 2019 nung Rs 1.81 crore

Iba ya Receipt and Payment Rules indang 135 alema inyakra lir, ta CAG-i ashi.

January 2022 nung state sorkari CAG nem telangzüba agütsüba nung drainage tasazük matongbaji

endok aser SDO, PHED o Executive Engineer ajanga countersigned asü ta CAG-i ashi.

February 2021 nung Departmental officials, Village Council Chairman/Water and Sanitation committee members aser yimtsüng 21 nungi beneficiaries den Joint Physical Verification (JPV) asüdag yimtsüng 21 nungi 3 nung Rs 23.23 lakh endoka 600 m drainage yangluba shia lir, ta parnokisa metetdaksü.

Tanüngba yimtsüng 18 nung Rs 1.57 crore endoka 4,065 m drainage yanglu ta shia lir saka shitakba nungbo Rs 66.87 lakh endoka 1,727 m dang yanglu. Iba ajanga 2,338 m drainage (783 m short-execution & 1,555 m non-execution) meinyak, ta CAG-isa ashi.

"Executive Engineer, PHED (Urban) Dimapur Division-i sen magütsüdag mapa inyakra junga mereprang aser iba ajanga yimtsüng 18 nung 2,338 metres drainage meyanglu ser Rs 90.54 lakh agütsü" ta CAG-isa metetdaksü.

Iba ya Receipt and Payment Rules indang 135 alema inyakra lir, ta CAG-i ashi.

January 2022 nung state sorkari CAG nem telangzüba agütsüba nung drainage tasazük matongbaji

tzümetsüng/alima lendong ajanga drainage bener aoba aser yimtsüng kar nungbo verification mapang teyangludak liasü ta ashi.

Ano, drainage meyangluba atema bangdak Department-i ashiba agi verification mapang drainage mapa teinyakdak liasü aser drainage shortfall aser non-construction renemogo ta ashi.

"Ajisüaka iba telangzükba magizüker kechiyong JE PHED-i (March 2019) nung renemogo ta kuli agütsüo aser iba nung SDO aser EE ajanga countersigned lir. Talisa Dimapur nung aliba yimtsüngtem ya tenem nung masü saka lenden nung lir anungji tzu agi pongtokba mesüra anentsüh agi anenzüka bener aoba kuli kecha mangur. Department-isa drainage ponger aoba tesem tejangja magütsü aser JPV mapang drainage ponger aoba mesüra mapa teinyakdak aliba kecha mangu" ta CAG-isa metetdaksüo.

"Anungji state sorkari drainage meyanglu ser tim mesüi sen agütsüba maparen ya metongshitsüla. State sorkarisa mapa inyakra osang tejangja metettsü atema tarutsü nungbo Geotagging asü junger aser iba ken o ya investigative agencies nem bushisüngdang südaksü nung ajungtsü" ta CAG-isa metetdaksü.

Lok Sabha 2024 election atema CEOs senden amen



Lal Bahadur Shastri National Academy of Administration nung state aser UTS nungi Chief Electoral Officers senden nung agiba noksa ka angur.

Dimapur, April 10, 2023 (TYO):

Lok Sabha, 2024 indang General Election atema Election Commission of India (ECI)-i Chief Electoral Officers atema sentong ka ayonga agiogo.

April 2 nungi 4 2023 tashi Mussoorie (Uttarakhand) nung aliba Lal Bahadur Shastri

National Academy of Administration nung iba conference-cum-retreat agia liasü ta CEO Nagaland V. Shashank Shekhar, IAS-i sangdong ka nung ashi.

Iba mungdang nung General Elections 2024 atema maparen renemtsüba, CEO Offices

indang inyakyim meyipa repringshitsü aser election maparen atema common minimum agenda renemtsü atema jembitep.

Iba mungdang nung States aser Union Territories 34 nungi Chief Electoral Officers aser ketdangsurtem aden.

Dimapur nung National Clean Air programme ka agiogo



Don Bosco School Dimapur nung nung National Clean Air sentong ka April 10, 2023 nü alidang Scientist 'B' Nagaland Pollution Control Board, Yanathung Kithan-i o jembiba mapang tangokba noksa nung angur.

Dimapur, Rongchii/April 10 (TYO): Don Bosco School Dimapur nung April 10, 2023 nü "Awareness and Capacity Building" omen nung ajemdaker National Clean Air programme ka agia liasü.

Iba sentong nung Scientist 'B' Nagaland Pollution Control Board, Yanathung Kithan ajanga PowerPoint ka agütsüba mapang lenmang balala nungi mopung menenba aser ibaji ajanga nüburtem dak kongshiba indang rasaa ashi.

Pai ashiba agi, National Air Monitoring programme kübok Nagaland nung manual monitoring stations 11, CAAQMS station ka lir, ta ashi.

Manual stations ya Dimapur nung Bank Colony, NPCB Office, Viola Colony, Tenyiphe-II Chumoukedima, Burma camp, Dhobinala, Kuda-C, Nagarjan nung lir, Kohima nung Monitoring Stations opposite NST Office, PWD Junction, High School Junction, Upper Midland tesemtem nung lir.

Nagaland nung Waste Management Scenario tsütsü scientific treatment plant ka dang aser aji Kohima nung lir, koba 50 TPD Capacity aser

MoHUA kübok ADB-assisted NE Region Urban Development Programme ajanga senotsü teyari agüja amenoka lir.

Küm nung RSPM average concentration ya sorkari 60 lateta lir, kong 60 kübok mopung ya tajung lir, ta pai ashi.

Ajisüaka Dimapur yimti nung 2019 nungi 2022 RSPM average concentration ya 79, 78, 99, aser 97 sayur, koba tali timba akumer. Kohima nung 2019 nungi 2022 tashi RSPM ya 91, 89, 77, aser 72 lir, aser ajibo tajungba akumer.

Particular Matter (PM10) dak sendakba nung Kohima aser Dimapur yimti indang air quality ya non-attainment cities kübok yua lir, aser aji tebilemstü tulu lir, ta pai ashi.

Yanathung Kithan-i ashiba agi, National Green Tribunal Order kübok aibelener, concessioner, ULB aser nisung mesüra telok kobaisa iba ama aronger, item dang 'simple burning' atema environmental compensation sen 5000 meshitsü, 'bulk burning' atema sen 25,000 meshitsü tuyua lir.

Central sorkar nükjidong tongtetsü asoshi mapang

talangka atema, mapang telatet yur National level strategy nung National Clean Air Programme (NACP) tenzük aser iba nükjidong ya 2026 tashinung particulate matter tem shilem 40 agi ajemtsüba lir, ta pai metetdaksü.

Mopung menenba ajanga nisung temang nung timtem agütsüba indang pai lemsatepba mapang mopung majungba nungi Asthma, Cardiovascular, Lung Cancer, Diabetes amala adoker, ta ashi. India nung tzü-mopung menenba ajanga asür timba lir, ta ashi.

Yanhan-i kija, lokti tentet, Gram panchayat aser village council tem dang tesem teladak nung plastic jana merongdaksütsü ajungshia liasü.

Mopung menenba ya ajanga takum tepiyong temang nung timtem agütsür aser iba tebilemstü azüoktsü ya department ka kija khuret masü saka kin aser nisung ajak arok mapa lir, ta pai ashi.

Iba sentong teratet EAC Dimapur, Imlijungla Lemtur-i agütsü aser SDO(C) Dimapur, L. Samuel, NCS ajanga melepzüing o jembia liasü.

DDO-wise sub-allocation & EPay Bill atema training agitsü

Dimapur, Rongchii/April 10 (TYO): Heads of Departments (HoDs) ajunga dang sangdong ka nung ashiba agi, DDO-wise sub-allocation aser epay bill mapa inyaker ketdangsür atema training ka April 12, 2023 anüngdang 11:00 ako nungi tenzüka Treasury Directorate indang Conference Hall nung agitsü.

Financial Year 2023-24 nungi

tenzüka DDO-wise sub-allocation atema application tasen ka benokba mechi iba training ya agitsüsa akumer. Anungji department tem dang iba training-i ketdangsür ana-na den laptop dener yoktsü mepishir. Financial Year tenzükba mapang iba application semzükba ajanga jongdak nung iba osang sangdongtsüsa akumer, ta ashi.

NBSE ajanga Mann Ki Baat atema metetdaksür

Dimapur, Rongchii/April 10 (TYO): Nagaland Board of School Education ajanga Board kübok register süa aliba kaket reju tekolakpur ajak nem sangdong ka agütsüba nung, ita shia ato kilonser indang radio sentong "Mann Ki Baat" ya April 2023 nung sangdongtsü lir, ta ashi.

Iba dak sendakba nung Government of India indang citizen engagement platform, MyGov ajanga iba sentong tali tajungba, ajak amshia aser tetetzü aketba episode ka südaksütsü asoshi linük nübur ajunga nungi ideas aser suggestions meshir.

Tesem ajunga nungi shisatsü lemsatepba tem agütsüba nung yaritsü asoshi MyGov sapang ajanga QR code/ IVR (toll-free no.)

aketba banner aser standee designs tem renema lir. Aser itemji <https://drive.google.com/drive/folders/1Hj-sangdong-ka-agütsüba-nung-itashia-ato-kilonser-indang-radio-sentong-Mann-Ki-Baat-ya-April-2023-nung-sangdongtsü-lir-ta-ashi>

Nüburtemi <https://www.mygov.in/group-issue/inviting-ideas-celebrate-100th-episodes-mann-ki-baat/amshia-MyGov-portal-nung-oa-parnok-indang-suggestions-tem-agütsütettsü>

Anungji heads of institutions ajak dang iba website lapoka reprangtsü mepishir aser ano kaketshir, tesayur aser mapa inyaker ajunga dang pei tangatetba lemsateptsü asoshi metetdaksütsü mepishir, ta sangdong ajanga ashi.

H&FW ketdangsür temi Mon semdang



Commissioner & Secretary H&FW, Y. Kikheto Sema den department ketdangsür temi April 10, 2023 nü CHC Tizit semdangba mapang tangokba noksa nung angur.

Dimapur, Rongchii/April 10 (TYO): Commissioner & Secretary, Health & Family Welfare, Y. Kikheto Sema IAS den department nungi ketdangsür tem Mon jilai aodang April 10, 2023 nü CHC Tizit Town semdanga liasü.

Iba mapang Hans Foundation ajanga CHC Tiziti Town atema ki aser staff quarters yangluba nung CSR funds amshiba asoshi Sema-i tenüngsang agütsü.

Pai Principal Director dang department aser CSR funding nung sen indokba company tem tsüngta amalitep tajung akatsü ashi.

Hans Foundation ajanga Mon district nung nungdabapur nem Health Care agütsütsü asoshi Mobile Medical Unit Van tejang toku agütsüba atema Sema-i pelaba

lemsatepa liasü. Iba sülen parnoki Tizit yimdak Sub-centre (Health and Wellness Centre) semdanga yangji ketdangsürtem den jembia liasü.

District nung Health & Wellness Centre tajungtiba rongnung ka ama anepaluba atema Kikheto-i CHO aser staff tem dang pelaba lemsatepa liasü aser office tuluba akumtsü aser staff tem asoshi ki yanglutsütsü atema Tizit yimtsüng ketdangsür dang ali peria agütsütsü balaka mepishia liasü aser yimtsüng nung lenirtemia pelashishia agizük.

Commissioner & Secretary ya meina Principal Director Dr. Vibeitono M. Sachu, Additional Director, EE, CMO Mon nungertem oa liasü.

Nagaland nung taxes atema awareness nungdaker: Advisor Khamo



Hombarnü Commissioner of State Taxes Training Hall nung tenüngsang agütsüba sentong ka nung Advisor, CAWD & Taxes, Kudecho Khamo-i jembidang tangokba noksa nung angur.

Dimapur, Rongchii/April 10 (TYO): State nung tax atema awareness nungdaker, kechiaser state nung department ya kanga tasen lir aser department-i taxes ozüing amshidang tetsükdaksü ajurutsü, ta Advisor, CAWD & Taxes, Kudecho Khamo-i ashi.

Pai iba o ya Department of Taxes ajanga Hombarnü Commissioner of State Taxes Training Hall nung pa nem tenüngsang agütsüba sentong ka ayongzükba agidang shia shia liasü.

"State nung nisung aika atema tax ya tasen ka asütsü, aser iba yongji taxes laws mapa kuma inyakdang tetsükdaksü ajurutsü. Tax ya ajaklen terenlok atema nungdaker aser

nüburtemi teyari agiba ama meyiper agütsütsü ya tongtipang ta awareness agütsütsü nungdaker," ta Advisor Khamo-i ashi.

Department of Taxes ya department tilatiba rongnung ka ta züngshiaka state sorkar asoshi tongtiret lir aser state sorkari ajaklen terenlok maparen balala inyakba den külemi employee meyirijang aika indang itasen department-i taxes bendenba nungi menoker, ta pai ashi.

State ajungtsü asoshi department nung inyaker shia tongti shilem lir, ta pai ashi.

Chief Minister Neiphiu Rio-i pa dak tamang kaa CAWD aser Taxes ketdangsütsü nungloktsüba atema pai pelaba

lemsatepa liasü. Department ajanga bendanga agütsür tajungtiba nung nübur tenzükba asoshi pai tepela lemsatepa liasü. Paisa ketdangsür tem dang department ajungkettsü asoshi amalitep akatsü aser bendanga agütsür inyaksü ayongzük aser team ka ama inyaksü asoshi ajakdang nungi shisatsü meshia liasü.

Iba sentong nung Gregory Thejawelie, IAS, Commissioner of Taxes ajanga pela agizükba o jembia, Y Mhathung Murry, Spl. Commissioner of State Taxes menden liasü aser Wochamo Odyuo, Additional Commissioner of State Taxes ajanga melepzüing o jembia liasü.

Sisodia apuba anema campaign nung sign lakh 10 bendenogo: AAP



April 10, 2023 nü New Delhi nung aliba AAP headquarters nung Aam Aadmi Party (AAP) lenirtem- Gopal Rai, Saurabh Bhardwaj aser Atishi nungeri osangbenertem den jembidang tangokba noksa nung angur.

New Delhi, April 10 (Agencies): Hombarnü Aam Aadmi Party (AAP)-i, party lenir ana- Manish Sisodia aser Satyendar Jain na apuba anema signature campaign tenzükba sülen tang tashi nung signature lakh 10 dak tema bendenogo, ta metetdaksü.

Ato kilonser, Narendra Modi nem shidi ka agütsüsü aser Sisodia o Jain na apuba anema longkak aittsü, ta AAP Delhi unit convener, Gopal Rai-i metetdaksü.

Taoba ita AAP-i signature campaign tenzük aser parnoki Delhi nung aliba ward ajak nung kibok sema signature

bendena liasü. Hombarnü osangbenertem den jembidang Rai-i, "Onok nukjidongji signature lakh 10 bendentsü liasü aser onoki Amongnü iba alizungji tongogo. Party district incharges, Lok Sabha in-charges aser councillors-i iba campaign nung shilem agia liasü," ta metetdaksü.

Sisodia aser Jain nati Delhi nung shisaliok aser healthcare ajungkettsübaji nisung ajaki meteta dang lir, ta Rai-i metetdaksü.

"Sisodia-i sorkar school tem nung temelenshi adokdaksü aser Jain-i mohalla clinics tatishitsü tajung agütsü. Tena jail

nung puokba atema atangji nürburtem jashir," ta pai ashi.

Iba campaign pusemba atema Delhi Health Minister, Saurabh Bharadwaj-ia Delhi nung alirtem dang pelaba metetdaksü.

Delhi Excise Policy 2021-22 ken o nung ochimashi liasü, ta tai tonglokja iba ken o dak sendakba nung taküm February 26 nü CBI-i Sisodia apu aser senotsü ochimashi ken o ka nung yaküm May ita nung Enforcement Directorate-i Jain pua liasü.

Taküm February ita nung tenapronglai Delhi cabinet nungi anena liasü.

Amritpal Singh den külemi inyaksemer, Papalpreet Singh puogo

Chandigarh, April 10 (Agencies): Khalistani sayutsünger, Amritpal Singh den külemi inyaksemer, Papalpreet Singh Hombarnü Punjab kübok Hoshiarpur district nung puogo.

Amritpal Singh bo tang tashi miimshia jenshia senzüdar.

Punjab police aser Delhi police nati senteper Papalpreet apu.

Papalpreet ya Amritpal nem shisa agütsür ka aser pa ya Pakistan nunger ISI den-a tesendaktep lir, ta tai tonglokja lir.

Punjab police-i Khalistan lenirtem aser pusemertem mita ao tenzükba sülen Amritpal aser Papalpreet na March 18 nungi jenshia senzüa liasü saka

Papalpreet bo puogo. Papalpreet Singh ya aluyimer kibong ka nung lir. Pa convent school ka nung azüng aser PG diploma angu. Papalpreet Singh-i pa arrshi küm 20 asüba mapang nungi yimtenren nung ajemok aser Sikh Youth Front den Sikh Youth Federation (Bhindrawala) nunga inyak.

Pai Khalistan movement pusemba den külemi 1990s nungi tenzükba jail nung puoka aliba Sikh nunger lenirtem chiokang ta akhanger.

2015 küm Sarbat Khalsa mapang nung pai telungpur Narain Singh Chaura-i taoba

mapang Parkash Singh Badal-i aniba sorkar anema ken o zünga metetdaksü aser "Khalistan ajanga dang telangzüba angutsü" ta jembiba sülen pa nungtugu aküm.

2016 küm pai Shiromani Akali Dal (Amritsar) nung adenba sülen 2017 küm state assembly election nung pai Simranjit Singh Mann atema nübo yimja liasü, ajisüaka Mann-i tamakok angu.

Papalpreet Singh-i Amritpal Singh den onük aika nung shisa lemsateper aser yaküm pa India-i meyipa aruba sülen nungi Amritpal den kanga atongsema inyaker.



April 10, 2023 nü New Delhi nung World Homeopathy Day 2023 anogomong sentong nung linük tatong Tir, Jagdeep Dhankhar aser AYUSH Union Minister, Sarbananda Sonowal na den tangartemi Homeopathy indang kaket balala sayatsüdag tangokba noksa nung angur.

Karnataka election atema BJP-i candidate 170 sangdongtsü: Bommai

Bengaluru/Delhi, Rongchii/April 10 (Agencies): Hombarnü Karnataka chief minister, Basavaraj Bommai-i, taruba state assembly election atema Bodhbar tashi nung BJP-i candidate 170-180 tenüng sangdongtsü, ta metetdaksü.

Karnataka nung May 10, 2023 nü assembly election agitsü aser May 13 nü vote zünga election agiba osang sangdongtsü.

Bommai-i, candidates shimba maparen nung mangatettep kecha mali; mezüngbuba list ji asüng (Mongolbar) mesüra yanü (Bodhbarnü) sangdongtsü, ta metetdaksü.

Delhi nung osangbenertem den jembidang pai, "Tanü nikongdang candidates sangdongtsü sentong liasü saka ano maneni o lemteptsüsa akümer, anungji Mongolbarnü mesüra Bodhbarnü ang sangdongtsü," ta metetdaksü.

"Candidate kar atemabo osang maneni bendentsüsa lir iba sülen ang candidates tasen shimtsü," ta Karnataka chief

minister-isa metetdaksü. Hombarnep taoba mapang chief minister aser BJP Parliamentary Board member, B S Yediyurappa-i, assembly menden 224 aliba election atema nikongdang mezüngbuba list nung candidate 170-180 shi sangdongtsü, ta metetdakja liasü.

Ajisüaka nikongdangbo Yediyurappa-i, "Yashi onoki constituency ajak atema o lemtepa liasü. Tanü-a party National President, J P Nadda-i ni jaoka osang kar maneni metetpelaogo. Tanü nikongdang mesüra asüng tashi nung pai candidate kar shimtsüa akok," ta metetdaksü.

JP Nadda-i anepdang ayongzükba senden nung medentetba atema na jashir asü? ta asüngdangba langzüdang Yediyurappa-i, "Ni parnok (BJP bangdak lenirtem) matsüngdang benokba ajak parnoki melungogo. Onoki majority ngua sorkar akümtsü. Iba nungji teratatsü kecha mali," ta ashi.



April 10, 2023 nü Washington D.C. nung Ambassador of India to the United States, Taranjit Singh Sandhu-i Union Finance Minister, Nirmala Sitharaman agizükba sülen tangokba noksa nung angur.

Taküm tzünglu shilem 20 agi tajemba arutsüa akok: Skymet

New Delhi, Rongchii/April 10 (Agencies): Taküm India nung tzüngluruwa mongpu 'below-normal' asütsüa akok; La Nina ajanga tzünglu shilem 20 agi tajemba arutsüa akok, ta Hombarnü Skymet Weather-i metetdaksü.

Tesüiba küm pezü tashi India nung tzüngluruwa mongpu 'normal' mesüra 'above-normal' liasü, ajisüaka takümbo tzünglu ajema arutsü takzütetba ya aluyimertem atema tebilemtsü onük ka lir, kechiyong alu nungi chiyungtsü balala züngsentetsü atema tzüngluruwa mongpu tzünglu dak tuluba metaloker.

Skymet Weather-i tzüngluruwa mongpu (ita pezü June-September) nung tzünglu 868.6 mm arutsü takzüteter. Talisa northern aser central India nung tzünglu kanga ajema arutsü; tzüngluruwa mongpu tiyong- July aser August ita na nung Gujarat, Madhya Pradesh aser Maharashtra nunga tzünglu kanga ajema arutsü.

North India nung Punjab,

Haryana, Rajasthan aser Uttar Pradesh state tem ya aluyimba tiyongtsü lir aser item state nunga tzüngluruwa mongpu nung tesüsabuba ita ana (August- September) nung tzünglu ajema arutsü.

Skymet-i, "Tzünglu shilem 20 agi tajemba arutsü," ta metetdaksü.

Tang tashi India Meteorological Department (IMD)-ibo tzüngluruwa mongpu atema report magütsü, ajisüaka parnoki maximum temperatures bo 'normal' dang nungi teimba asütsü aser April nungi June ita tashi nung linük tesem aika nung kanga tatsük asütsü, ta metetdaksüogo.

IMD-i, taruba anogo 3-5 tsüngda linük tesem tulubaka nung maximum temperature 3-5 degrees Celsius agi teimba akümtsü, ta metetdaksüogo.

Kasa mapang nungji Northeast India aser anüolen Himalayan region nungbo normal temperatures alitsü, ta IMD-i metetdaksü.



TIR YIMYIM YIMOBILEM (EDITORIAL)

DIMAPUR SANGTENNÜ, RONGCHII (APRIL) 11, 2023

Yaritsüba mapang

Alima nung kar atema lendong mapang ya kar atemabo teyari agütsütsü mapang tajungtiba lir. Iba mapang aser nungdakji meteta kodang inyakdir, idakji jangratemtsüka lir kechiyong tepela, tesünep aser yimjungji nungdakba purtem o nungdak agütsürtem na ajurutepdakji adoker. Iba tajung aser tajangzük angateterkem kija kibong, lokti aser arogotemi alima nung tama-ngu lendong tulu ajururtem mulungsua yariba asenoki mapang shia angur. Alima nung nisungtem shitak lia ajungbena kecha maka timtem tesama aser lendongi aitsüba alima lendongtemji menoknok, tzümetsüng aser kitsük-kirong lendongtem ya lir. Asenok tia ajung, Tsüngrem taochi agi asen lima nungbo menoknok aser tzümetsüng lendong mataloker. Ashiko, iba jagi balaka asenoki tangar menoknok aser tzümetsüng lendong ajururtem timtem tia indang shishia mebilemstür asütsüa akok. Ajisüaka, asenoka mapang - mapang shia kitsük-kirong lendongbo tululu ajurur, anungji asenoki taliba ki ajak rongdoker anarongdena pei temang kümzükba purtem tiabo angur aser ajurur. Alima lendongsa rongnunga kitsük-kirong lendong yasa tuluba asütsü amai bilemer, kechiyong taküm piyong bendenba rongsen ajak aut küma rongdokba takoksa aser timtem lendong dang nungibo nisung ka taküm lia ajurutsüba lendong tulubabo malitsü, kechiyong aji serbo tasüba lendong dang asütsü südi. Talisa asen alidak iba ama timtem aser takoksa lendong tulu ajuruba mapang ya asenok asoshi nungdakba purtem yaritsü mapang tajunga ta bilema inyaksü junger. Aji oda, yakanü asenok tamangertem Yisu shia aruba anogo pelatepa amungdang, Burma Camp kiyong Dimapur nungbo nisung dena rongseta asütsüsa kitsük kirong tulu atalokba ya Tsüngremi asen mulungjang tendanger amai lir. Iba kitsük-kirong lendong nung ki noklang asem shi menakrepa rongdokogo aser yangji alir nisung meyirijang ka shi talidak maka kümogo. Parnok asoshi talidak, chiyongtsü aser abensüoshi nungdaker. Parnokji tzümar aser mamangba purtem lir, anungji, talisa, Dimapur nung alir Khristan purtem asoshi Yisu temeim mapa agi nungdakba purtem sayutsübaji tang ya mapang tajung lir. Atangji, tang amaji, Dimapur nung lendongtsüdong atalokdak yimten yimsüsürtemi anir lokti, arogo aser kija kibong aikati tenla agütsüba angur, kechiyong odanga asenok Naga nungertem ya tagütsünü aser teyarinü. Ajisüaka, ano makaba agi mesüra magütsünüba agibo masütsüa akok saka merajemba agi asenok kija kibong aser arogotemi aiben iba ama alima lendong atalokdak tonga oagi tesama aser takoksa angurtem ajurua sarasadem agüja teyari agütsüba kangabo mangur aser memeteter. Ibaji asenok asoshi Yisu asüba aser shia aruba temeim indang kuli asütsü mapang tajung ka arur kuli mesütet süidaktsübatem asütsü. Atangji, tang ama alima lendong tulu nung kecha maka rongdoker alidang sarasadem kija agütsür aotsübaji Laishibai melaba masü. Aji mapa maden ser tebang kisüng agi amangba purtem asütsü. Item timtem shisabolu, nungdak aser asenok teinyaktsü shilem bilemdanga asenok kija kibong aser arogo shiai nungdakba purtem nemji pei akok teyari agütsütet nungbo, iba jagi nisungtem kodaka teyari ngula aser kotaka Tsüngrem sentsüwangshidaktsüla ta bilemer. Talisa, Dimapur nung asenok rongnung nünngdakba purtem nem teyari agütsütetsüsa kibong aser arogo aika Tsüngremi moaja lir. Aji oda, tang kitsük-kirong lendong ajururtem rongnung asen nisung aser kinunger maliba taohiji reprangteta asenok kibong aser arogo shiai pi takoksa ajururtem nem pei akok teyari bener oa agütsür sarasademtsü nungbo koda temoatsü süla? Teyariji kobateka aser kwika agütsür ta masü saka koba tangatetba nung koma agütsür ta asübajiang tongtibang lir, anungji tilakati asüyonga ibai asenok ajanga Tsüngrem temeim sayutsüba mapang lir.

OLEMSABANG

Kinük Ola : Molungnen O

Mrs Lemdenla (Aoyimti)

Asen Ao oshi nung iba Tir Yimyim adokba küm aser anogo nungi iba paper azüngdang kanga dang pelaseta onoka Ao oshi nung osangtem angashia aser züngtetsüsa maongka anguba asoshi kanga pelar. Tongtipangsa yimobilem aser olemsabang oset tem azüngdang shisatsü aika ngua jangratema azünger. Aji oda March ita 26 nungi 29 anogo tashi oset ka azüngdang kanga dang temulung shiranga "Aoni" ta paper azüngba ka kanga dang temulung nung ajungshi nung iba oset tila ya zülur.

Tarutsü naganunger tia ngua nüktzü yima zülur ta asüba Tsüngrem lar S.M. Meren, Ex. Pastor-i züluba azüngdang tezülur dang masü tazünger temulung shiranga nüktzü yima züngogoni ta asüba lemsateper. Yamaji tazünger ajaki aoni ta zünger südi. Tezülurbo mapang aika endoka kanga bendanga agüja shisadanga zülüogo saka tesasatsüka asen Aorbo teinyaktetsüपुरi aser lanurtemi item ama oset züngnur mali, tongtipangsa Tir Yimyim aser Ao Milen nung asen Aor jurila agitsü züluba osetem mazünger. Onok ama tantsür- tambura azüngbajibo zünger pei mulung raksa-a azüngbaji dang asütsü saka tanü lanur tazünger tashirtem tenyaktetsüपुर tang alima amitta alirtemi item ya zünga angateta meinyakra amajok dang asütsü. Iba oset azüngdang " Tsüa " tanü lanurtemi, yimsüsürtemi, item ya züngshi asübo aser zünger mapa küma inyak asübo koda jungla.

Iba oset züluri nüktzü agi ananga züluba ama asen Aor-a pei lima, pei nübur asoshi bilemba noklang nung ter danga alinungbo koda jungla na ta bilema züngogo. Item osettem tatongi azüngdang ozü Aor lanur rongnungia yamai tasü tait lenir kar danga adokdakjangni ta sarasdema züngogo. Yimya agi asenoki osang kakettermji züngerbo iba kaketti leptolepratsü aser lemoklemratsü nung dang amshir saka iba paper yabo kaotsüanga mashi nung mamshika tasür mejipteter yabo mazüngeritem nema züngdaktsütsü ta sür rizünga ayu.

Anungji pei lima, pei nübur, meima shisa lemsa-a agütsürtem asoshi anema tokjang ta aser arishi meshitsüa sarasadem nungettsü nungdaker. Aser teinyaktetsüपुरibo zünger ola atoka ajungshitepa nungittepangkoto ta shisemer. Anungji tanü Tsüngrem tenzükertem, tamangtirtem, yimden yimsüsürtem shirnok nemsä Tsüngremi kechi hatir nüket nung amokja lir iba hatir ka majangshia amer tsüngden yongshir asen nüburtem tanular wadang aser alima wadang nung tejaklen anitsü meranga aposoangni ta porep tazünglai ayongzükur.

" RONGSEN MASÜ TENÜNG TAJUNGANG SHIMDI "

~ L. Kika Pongener.

(Yashi adok nungi...)

Nisung aikati ochimashi inyaka, tim masüba lenmang nungi bener aruba rongsenji tajangzük tulu amai bilemstü akok, saka item rongsenji kecha tajangzük mali. Tsüngrem o-i ashir..."Tamajung agi ajangzükba rongsenji kecha tajangzük mali" (A.Shin-10:1). Asenoki rongsen/sen ta süra ajungaji tajung amai bilemer dang ashi, tim masüba lenmang nungi bendenba rongsenji tetibo asen ket nung malitsü. Iba rongsenji koloni ao-a memeteti senzüka oa-adoktsü. "Ajongben anguba rongsenji ajema akümstü; Saka züsenba agi terara shibai bendendir aji züintsü" (A.Shin-13:11). Asentsü sena meranga inyaker terara bendenba rongsenjibo tali tali dang züintsü, saka tiyazü jembia, ochimashi mapa agi aazüka bener aruba rongsen/senji juli/yangkü tapok nung enoktsü bener arur dang agütsü. "Tiyazü temeli agi anguba rongsenji meyipzua alungba tangola" (A.Shin-21:6). Tangola ya tenuk agibo angur saka teka agi tangshitsü makoker...Aji oda, tiyazü temeli agi aazüka bener aruba rongsenji khenbo angur amai agütsü, saka asenoki magishitsü, oda meyipzua alungba tangola ka amai dang koloni ao'ar memeteti oa-adoktsü. "Nisung tajungi pei semchisemnur nem senmangtsü toktsür; saka temenenpur rongsenji temeshipur asoshi rizünger" (A.Shin-13:22). Ashiko, aseni tim masüba lenmang nungi bendenba rongsenji tangar kar asoshi bendentsür dang agütsüa shibai metet...!!! Yimden, arogo aser lokti meyong rongsen nungi alozuka asen agiba aser Election amala nung bendenba rongsenji, ashiko, asen jala-jabaso kar tenarong maden/samaro/samesa küma inteter parnoki chireptsütsüa shibai metet. Mesüra aseni tim masü lenmang nungi bener aruba rongsenji tashitak tamajung kar adoker, Hospital nungang endoktsüa shibai metet. Anungji rongsen tulu dang nungibo tenüng tajungang shimdi. Asenoki tenüng tajung aazüka yutsüra chirnur/semchisemnuri iba senmangji amangtsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Indonesia nung ketdangsertemi ano Tenla ki ka shibangtsüogo



Indonesia nung Simalungun Christian Protestant Tenla ki shibangtsüba sülen Purwakerta Regent, Anne Ratna Mustika-i osangbenertem de jembidang tangokba noksa nung angur.

Surabaya (Indonesia), April 10 (Agencies): Taoba Honibarnü Indonesia kübok West Java Province nung ketdangsertemi Tenla ki ka shibangtsüogo.

Hopta ana tejaklen Muslim nungertemi Tenla kidangji timtem agüja liasü, iba sülen Tenla kiji shibangtsüsüla, ta ketdangsertem nem takhangba agütsü, ta Arogo lenirtemi metetdaksü.

March 19 nü Muslim nungertemi Tenla kidangi arua timtem agüja tekülem sentong magütsü metetdaksü, ajisüaka Purwakerta kübok Cigelam nung aliba Simalungun Christian Protestant Church (Gereja Kristen Protestan Simalungun (GKPS) Arogo nung züngsemtemi maneni tekülem sentong agia aru.

Tenla ki shibangtsürtemji Purwakerta Regent, Anne Ratna Mustika den Indonesia Ulema Council (Majelis Ulama Indonesia) lenirtem, police aser sepai ketdangsertem, local religion department chief aser National & Political Unity nungi chairman liasü.

Osangbener den jembidang Anne-i, Tenla kiji ozüing alema asüba lir, kechiyong Arogo ket nung temelaba agütsüba shidi den certificate mali, ta metetdaksü.

Ajisüaka Purwakerta GKPS Elders Council nung tongti, Krisdian Saragih-ibo, ozüing kübok inyakim alema Tenla kiji shibangtsü, ta ashi.

Paisa, "Court obendang nung ang ajemdaker Tenla ki shibangtsüsüla, kechiyong ibaji ajanga dang sorkari ozüing kübok inyaker ta kuli sayutsü," ta ashi.

Easter atongtsü mapang anasa Arogo nem jelia osang magütsüi Tenla ki shibangtsüba ajanga Khristantem mepelar, ta pai ashi.

"Iba ya onok atema tejashitsü tatalokba ka lir, kechiyong iba ya Easter

Temeshi Hopta anasa atalok. Tenla ki shibangtsübaji-a tim masü, kechiyong ketdangsertemi onok nem jelia osang memetetdaksüi shibangtsü. Onok malidang Tenla ki shibangtsü. Tenla ki shibangtsüba mapang nung Arogo lenir mesüra züngsem shinga maliasü," ta pai metetdaksü.

Krisdian aser Pastor Julles Purba nati, Tenla ki shibangtsüsü melenbo ketdangsertemi kiojen asütsü atema temelaba osang ang metetdaksü nung tajungba süla, ta ashi.

Arogoi kodanga iba ama timtem majuru, Tenla ki anasa alir kiyongertemia kodanga timtem magütsü ajisüaka March 19 nü mezüing onoki timtem ajurua liasü, ta Krisdian-i ashi.

Indonesia nung Joint Ministerial Decree of 2006 (SKB) ozüing kübok Tenla ki tasen asütsü atema permit angutsüji kanga tasak kümogo.

Purwakerta Regent, Anne Ratna Mustika-i, Tenla ki shibangtsüba ya khenpiga atema dang lir, Arogoi permit ajak anguba sülen lapoktsüsü, ta metetdaksü.

Anne-isa, la den local religion department-i GKPS Arogo züngsemtem tekülem sentong agütsü atema Tenla ki melaang ta anasa aliba Arogo 19 dang asüingdangtsüogo, ta ashi.

Laisa, Purwakerta Regency Government Coordination senden nung Regional Leadership Coordination Forum, Indonesian Ulema Council (MUI), Office of the local Religion Department, Forum for Religious Harmony (FKUB), Purwakerta Cooperation of Churches Agency (BKSG) aser GKPS nungi züngsem kar densema liasü aser iba senden nungji loktiliba nung tesünap alitsü

atema Tenla kiji shibangtsüsü telemetba agi, ta metetdaksü. Ajisüaka GKPS züngsemtemibo, iba senden nungji parnok maden ta shiogo.

Tenla ki shibangtsüba anema Communion of Indonesia Christian Churches (Persatuan Gereja Indonesia, PGI)-ia Anne nem temepishiba shidi ka agütsüogo.

PGI Justice & Peace Body chairman, Henrek Lokra-i sign süa aliba shidi nungji yamai shia lir, Tenla ki shibangtsübaji tamangba yimsü tsüingda tarezmüktep maliba aser bendanga züngshiba mapa ka lir.

GKPS den kasa area nung Arogo asem - Indonesia Christian United Church (Huria Kristen Indonesia), Batak Karo Protestant Church (Gereja Batak Karo Protestan) aser Indonesia Christian United Church (Huria Kristen Indonesia) Arogotem-a Tenla ki mali, ta kasa shidi ajanga metetdaksü.

Tesüiba küm 30 tsüingda item Arogotem jaji Tenla ki asütsü atema temelaba agüjang, ta mepishia shidi aiben zülüogo; iba mapang nungji nübo aser rongsen jenti indokogo, ajisüaka tang tashi temelaba magütsür, ta kasa shidi ajanga metetdaksü.

"Onoki iba tatalokba sashia aitsür aser Minister of Home Affairs aser Minister of Religion na ajanga Indonesia Tir dang Purwakerta Regent, Anne Ratna Mustika nem temerenshi agüjang aser la dang GKPS Arogo den Purwakerta nung aliba tanga Arogotem nem 'temporary permit' agüjang ta tuyuang ta akhanger," ta kasa shidi ajanga mepishia metetdaksü.

Alima nung Khristante alitsü linük tamajungtiba 50 rongnung Indonesia ya jenjang 33buba nung lir (Christian support organization Open Doors' 2023 World Watch List).

ANOGO ABEN TSÜNGREM DEN

Nisung Yimya
Lipok 1: 24-31

Atangji alima nung aliba shiruru dang nungi meimchirji balaka asü ? Shiruru lima nung meimchir indang shisadangtsübaji kuli aika lir. Tanga shiruru ama pa asor, tangu sashir, achir, mejanger aser asür.

Kechi nung balaka ? Khristan theologyji nisungji Tsüngrem mesüka yanglu ta ashir (Lipok 1:27). Shiruru yamaji masü. Teyangluba nung nisungji balaka yanglu ta sangdongbaji asenoki metettsü tenüingdaksü. Pa Tsüngrem dang nungi teküpbokba kechiaser pa Tsüngremi yanglu, pa shiruru dang nungi temaba kechiaser pa Tsüngrem mesükba nung yanglu.

Atangji asenok tetsübutsü ka aser tesüngmangtsü ka yanglu (T.Ken 139:14). Itemi shisadangang: Laishibai ashir, asenok shiruru dang nungi temaba. Süra kechiba aikati akhüm dang nungi teküpbokba nung shiruru jakla ama alir aser inyaker ? Meimchir libaliro ajak nung asenoki shibai asenok Pa mesükba nung yanglu, Pa ama alitsü merangtsüla.

Sarasadem : Ne tashikang akhüm kübok ni miimang : tenükjang ama ni kümzükang.

T.Ken 17:9.

Tenangzükba : Kechiyong shibai nenok dak kongshir Pai pei nükjang nung kongshir.

PM Modi-i Tenla ki semdangba ajanga Khristantem nem teimla agütsür



April 09 nü Easter Sunday anogo nung India Ato kilonser, Narendra Modi-i New Delhi nung aliba Sacred Heart Tenla ki semdangba mapang Arogo lenirtem aser Children choir den külemi tangokba noksa nung angur.

New Delhi, April 10

(Agencies): Amongnü (April 09) Easter Sunday anogo nung India Ato kilonser, Narendra Modi-i New Delhi nung aliba Sacred Heart Tenla ki semdangba sülen Khristan lenirtemi, iba ya ajanga linük nung Khristantem timtem atema sorkar den jembitsü atema teimla agütsür, ta ashi.

2014 küm BJP lenir Modi Ato kilonser akümba sülen tang mezüing pai Tenla ki semdang.

India tesem aika nung Hindu nunger telok balalai Khristantem anema inyaker, ta tai tongloktüba mapang ka nung pai Tenla ki semdang.

Delhi nung tongti putir, Anil Joseph Couto-i, "Ato kilonseri onok Tenla ki semdangba aser Easter salem lemsatepba agi onok kanga pelar," ta ashi.

Delhi region nung Eastern rite Arogo ana nungi lenir ana-Syro-Malabr Bishop Kuriakose Bharanikulangara aser Syro-Malankara Bishop Thomas Antonios Valiyavilayil nati Ato kilonseri Tenla ki semdangba

atema pelaba lemsatepogo.

Tenla ki semdangba mapang nung Couto-i Modi nem shia aruba Khrista kürakyanglu ka sempet agütsü; ajioda Modi-i iba sempetji pelaa agizük.

"Pai mapang tatsüka dang semdangyonga iba nungji temaitsü ka lir," ta Couto-i ashi.

"Modi-i minute 25 shi Tenla ki semdangba mapang nung pai shia aruba Yisu Khrista kürakyanglu matsüingdang candle ka tsüklok aser Easter osangtajung ken asem atenba repranga liasü. Paisa tanur choir den jembia aser parnok den külemi noksa tangoka liasü," ta Couto-i metetdaksü.

Easter anepdang Modi-i twitter ajanga, "Tepela Easter! Iba ama anogomong ajanga asen loktiliba nung tesünap tanela adokdakjang. Iba anogomong ajanga loktiliba tenzütsü aser tashimaitertem nem tashi agütsütsü atema nüburtem ajungmesoang. Iba anogo nung asenoki Kibur Khrista tesayubatem bilemteter," ta lemsatepa liasü.

AO OSHI ANGAZÜKDAK: TANÜ ANGAZÜKTSÜBA OJANG



Poksak

(v) chiyong tulu (gluttony)

* Poksak pur alidak aiben chiyongtsü agi meperir.

Poksen

(n) tebok aoba wara (dysentery)

* Akhidangbo poksen wara agi nisung aikasa asü.

OLONG PAITEP # 6483

15x15 crossword grid with numbers 1-19 indicating starting positions.

TIPIEN

- 2. Teburtemi tejak nung awaba - (8)
6. T _ _ _ em - (3)
8. Tzük ayudak - (3)
9. Nungdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nubo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanüdagtsü - (4)

OLONG PAITEP # 6482 TELANGZÜBA

TIPIEN :

- 1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

- 1. Tenükjang, 2. Luden,
3. Kioksü, 5. Lenti,
7. Tajangzük, 11. Teronem,
12. Sempa, 13. Jahaz.



ALOKBA ITASEN TUDAKTSÜNER :

- Alokba : Sir, ni itasen tera menüngketjang.
Boss : Wa, koda asü, yakü mang itasen tutsü masü na?
Alokba : Tanga maha ni ya company aseme arishidarja.
Boss : Kechi company sa aka?
Alokba : Gas company, electrical department aser water supply teloki bushidarja.
Boss : Oh Alokba, bill memenok sülabä.

Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Assam Rifles indang Commander's Conference 2023 agi



Shillong, April 10, 2023

(Agencies): Laitkor, Shillong nung Assam Rifles Commander's Conference 2023 mongogo.

April 8 & 9, 2023 anogotem Lieutenant General PC Nair, PVSM, AVSM, YSM, PhD, Director General of Assam Rifles menden ser iba mungdang among aser Formation Commanders, Battalion Commanders and Staff Officers of Headquarters DGAR aser Formations ajak aden.

'Sentinels of the North East' aser 'Force that Binds the North East' nungja ama litettsü atema operational aser administrative

maparen tajungba akümtsü indang mungdang nung lemsatep.

Director General Lieutenant General PC Nair-i Formation aser Unit Commanders nem tenüngsang agütsü.

Parnoki pei pei tesem nung yimjung aser tesü nep tensa ngutetba atema tenüngsang agütsü.

Assam Rifles-i North East nunger den teti külemi dnag arur aser parnok kümzüka ayuba den libaliro tajungba lidaktsütsü meranger ta pai ashi.

Iba mungdang nung Assam

Rifles Director General-isa "1962 The Great Himalayan War of Valour, Glory, Sacrifice" indang kaket ka sayatsü aser iba nung 1962 War mapang Assam Rifles-i shilem agiba indang zülua lir.

1962 war nung Assam Rifles sepa 143-i taküm bendanga agütsü. 1962 War sülen Assam Rifles sepa 5 nem Vir Chakras, 5 nem Kirti Chakras, 2 nem Shaurya Chakras aser 2 nem Sena Medals agüja liasü.

Iba mungdang amongba sülen "Assam Rifles Through The Ages" movie special screening liasü.

Amit Shah-i Kibithoo jila semdangbaji otsüsütsü lir: Arunachal CM

Itanagar, April 10, 2023

(Agencies): Union Home Minister Amit Shah-i Kibithoo semdangba ya otsüsütsü mapang ka lir ta Arunachal Pradesh Chief Minister Pema Khandu-i ashi.

China arrtsülen Kibithoo ya India tatembangba jila lir. Union Home Minister-i 'Vibrant Village Programme' tenzüksütsü atema iba yimtsüng semdang.

"Union Home Minister Amit Shah-i Vibrant Village Programme tenzüksütsü atema aru. Taoba border area development programme (BADP) ya Centre sorkari Vibrant Village Programme ta

melenogo" ta CM Pema Khandu-i ashi.

"Iba scheme kübok northern borders aser China den arrtsülen aliba yimtsüngtem nung terenlok mapa inyaksü. Arunachal Pradesh nung iba model inyaksü atema yimtsüng teimtiba lir" ta paisa ashi.

"LAC (Line of Actual Control) nung aliba yimtsüng ya India nung tatembangba yimtsüng masü saka mezüngbuba yimtsüng lir ta shiogo. Anungji Centre aser state sorkar yaritepa convergence model inyaksü ta PM Modi-i shiogo" ta Khandu-isa metetdaksü.

"China-i tawa tu Arunachal Pradesh nung tesem 11 tashi South Tibet indang shilem ka shia nungja melenshitsu merangbaji onok atema inyakyim tasen masü. China-i tesüiba nunga anaben tashi iba mapa tamajung inyaksü merangogo aser Ministry of External Affairs-i China nem osang sangoktsüogo" ta paisa ashi.

"India nung yimtsüng tatembangba nung internet services angutsü imlar. Taküm küm tatem tashi nung yimtsüng ajak nung internet services angutsü imlar" ta CM Khandu-isa ashi.

Tripura nung CPI-M-i CM nem memorandum ka agütsü

Agartala, April 10, 2023

(Agencies): Tripura nung CPI-M-i Chief Minister Dr Manik Saha den ajurutep aser election sülen lendong atalokba atema memorandum ka agütsü.

Election temer CPI-M party züngsemtem amakba atema parnoki memorandum agütsü.

Taoba Chief Minister aser politburo member Manik Sarkar-i anir CPI-M teshimtet teloki CM Saha den ajurutep.

Iba telok nung CPI-M state committee secretary & MLA Jitendra Choudhury, state committee members Pabitra Kar, Left Front Convener Narayan Kar aser taoba minister Manik Dey nunger dena liasü.

BJP ajanga nungitba nisungtemi CPI-M züngsemtem teti amaker, ta taoba Chief Minister Manik Sarkar-i ashi.

"Parnoki ozü nisungtem dak dang masü saka parnok libaliro

nunga amaker. Kibong meyirjang aika senotsü tsütsü timtem tulu ajurua lir" ta paisa ashi.

"Onoki Chief Minister dang mapa inyaksü ayongzükogo" ta Sarkar-isa ashi.

Tripura nung CPI-M aser Congress MP külem telok kati lendong 1,199 atalokba indang osang Governor nem agütsüogo.

"Tanü onoki memorandum agütsüba nung lendong 2016 atalokba indang shiogo" ta paisa ashi.



Hombarnü Manipur nung college ka nung kaketshir nem smart phones agütsüba angur. Chief Minister's College Maheiroi (students) E-Support Scheme (CMCMES) kübok teshimtet kaketshir 300 nem smart phones agütsü. Lilong Haoreibi College, Thoubal College, Motbung College, Imphal College aser Ng College nung sensakertem asoshi smart phones agütsüba indang workshops ayonga agi.

Pakistan-i India ama Russia dang toztü malitet: Imran Khan

Islamabad, Rongchii/April 10 (Agencies): Taoba Pakistan ato kilonser aser Pakistan Tehreek-e-Insaf (PTI) tekolakba Imran Khan-i India indang foreign policy ano maneni tenüing sanga jembia aser no-confidence motion ka mechi pa indang sorkar atsüingdokba sülen Islamabad-i India ama Russia indang crude oil jenjang talang yong malitet, ta tuteta ashi.

Khan-i PTI workers aser Pakistan nübürtem den video message ka ajanga jembidang, küm 20 tsüingda Pakistan

nunger ato kilonseri Moscow semdangbaji pa dang liasü aser no-confidence motion mechi pai sen agi anünga aliba linük asoshi anisüingzük agütsütsüsa kecha mejembitet, ta ashi.

"India ama asenoki Russian crude oil jenjang talang yong aginü, saka yamaji meinyaktet, kechiaser tia maka no-confidence motion mechi ozü sorkar lao," ta Imran Khan-i ashi.

Sen agi anünga aliba Pakistan nem Russia-i crude oil consignment mezüingbuba April

ita yoktsü ta March ita temai adoktsüba sülen Khan-i iba o ya jembia liasü.

Pakistan ya sentsü yongi yir par sen tashi mait akum, anungji Russia dang sen tajemba nung crude oil alitsü meranger. Iba tezüingzüktep nung mezüingbo Russia-i temolung melemteti liasü, saka tawa senden amenba sülen linük ana tsüingta tesendaktep yangertsü asoshi tendanger ama Islamabad dangi toztü abenba rong ka yokdangtsü Moscow-i benok, ta osang balala ajanga ashir.

(Maneni tapak 8 nung...)

China-i asemnü military drills agiba tembangogo

Beijing, Rongchii/April 10 (Agencies): Asemnü drills agidang China-i Taiwan ajaklen nungi lungbanga ayu ama inyaka liasü aser iba asetkong tsütsü jets tem yokba nung aircraft carrier amshiba amai angateter.

Taiwan-i anüdoklen jet tem senzüba putet ta ashi aser China-i Shandong aircraft carrier-ia shilem agiogo ta ashi.

Taiwan Tir Tsai Ing-wen-i California nung US House Speaker ajuruba sülen Beijing-i iba exercise ya Honibarnü tenzüka liasü.

Taoba küm August ita Nancy Pelosi-i Taipei semdangba sülen inyaka amabo iba drills ya meliasü.

Taiwan-i par ya shinga küboka maliba linük ka ama alir. China-i par indang province ka ama züingshir aser nüngdakra tashiyim amshia Beijing küboki aitdaktütsü, ta ashir.

China-i iba drills takok ngua tembangogo ta Hombarnü ashi. Aji masüidang Taiwan-i par müketa tzüym nung raradang amshiba tayimtsü 70 aser rong 11 nguogo ta shia liasü.

Taiwan indang defence ministry ajanga tayimtsütem senzüba lenmang indang map ka sayaba nung J-15 fighter jets pezü asetkong anüdoklen aliba sayu, tetetzü China mitkar anüdoklen nungi amaker ama inyak.

Jets tem ya China indang Shandong aircraft carrier nungi aruba lir, ta shisadanger temi ashir, koba China ket nung ana lir aser tang Taiwan nungi mile 200 shi pilar western Pacific ocean nung yoka lir.

Hombarnü exercise agiba nung Shandong dena liasü ta China mitkari Hombarnü sangdong ka nung ashi. Raradang amshiba tayimtsü tem nung injang-bomb bener tongtipang targets tem nung amaker ama exercise ya agia liasü ta ashi.

Shandong yagi taoba mapanga air operations agia liasü, ta Japan indang defence ministry ajanga Hombarnü ashi.

Hokulbar aser Deobar tsüingta jet fighters aser helicopter tem Shandong nung 120 anen aser apusoa liasü, ta

Japanese ministry ajanga ashi.

Hombarnü US-i South China Sea ajanga Taiwan south tsütsü mile 800 shi pilar alidaki guided-missile destroyer, USS Milius yoka liasü.

China-i rong ya oziing alema par tzüym telungi ait ta ashi, saka US-ibo operation ya international law nung aliba ama inyak, ta ashi.

Tir Tsai-i Kevin McCarthy ajurba sülen Washington-i China dang aremzüksü shia liasü. Saka Beijing-i US aser Taiwan dang Tsai-i McCarthy ajurura tapet mera agitsü ta tekumdangtsü shir liasü.

France Tir Emmanuel Macron aser European Commission Tir Ursula von der Leyen densema bendanger lenirtem linük nungi ainshiba sülen China-i iba drills agitsü sangdonga liasü.

1949 sülen Taiwan jenjang ya tejangja ka maka, aser iba mapang Chinese Civil War nung Chinese Communist Party-i akok aser linük indang tejenba sorkar ya Taiwan asetkong nung jenok.

TENÜNGSANG AGÜTSÜR

Ozü lenir Wb. S. Supongmeren Jamir-i timtem toudhi jenti ajuruaka masetshi-i taküm piyong Congress Party tenzüka aruba süngjang, aser Tsüngremi ajemalurtem ajungkettsür ta ashiba asangsang küma Nagaland Pradesh Congress Committee (NPCC) mendenbuba jenjang tongtetba asoshi Congress Party Longsa Unit-i tenüingsang agütsür. Pa lenisüba kübok Nagaland nung Congress Party asentenshi milak tulu adoktsü imla-a atar. Tsüngremi lenir nem arishi talang den taküm tajung aser kotaker shisatsü moajangma.

Congress Party Longsa Unit tenüing nung;

Sd/-
Sosanglemba
Imkongyakba

Pelaba Lemsateper

Party nung kanga nentaka aser nübürtemi temolung lemtetsüsa mapa inyaka ngua asen lenir Wb. S. Supongmeren Jamir, Ex.MLA, Nagaland Pradesh Congress Committee (NPCC) tir asütsü Tsüngremer amsü nung kaoba asoshi 25 Mongoya Assembly Constituency Congress Committee ajanga pelaba den tenüingsang tulu agütsür. Pa akhüm nung Ao kin aser Naga nunger songjen yimjiyimjung nung anitsü temoatsü meshitsür. Tsüngremi maneni asen lenir nem arishi talang den anema aliba aser tayimjem shisatsü moajangma.

Sd/-
Alemchiba
Vice President
25 Mongoya ACCC



OFFICE OF THE
AO SENDEN

"Kibur Asahi" (For the People)

TENÜNGSANG YIMYIM

Ao senso tajung Wb. Moa Subong, Mongsenyimti yimtiba nungi asür Subongnuklu jabaso, pa dak aketba sempet tajungtiba amshiteta nübür tajangzük ngudakja inyaktetbayong India linük tamaren senpet rongnung tematiba pezübuba PADMA SHRI senpet khonang ngutetba asoshi Ao Senden mendenti ajanga Lanlia ta tepelaba lemsateper. Tarutsü nung maneni nübür asoshi tajangzük katetdaksüba lenir ka südakjang ta Ao Senden ajanga moaja tepelaba osang agütsür.

Sd/-
Wb. CHUBAWATI LONGCHAR
President

Sd/-
Wb. ARENTEMJEN JAMIR
Asst. Gen. Secy.

METETDAKTSÜR

Mrs. Benjongtola Jamir D/o Late Limaangnen Jamir, la dang shirisa sen apuja ali, ibaji onoki memetet aser kuli asütsü makok ta metetdaksür.

Lar kinunger;
1. Watilemba Jamir
2. Chubanüksung Jamir
3. Temjenmongba Jamir

North Korea-i South den phone ajanga tongtepratep masür

Seoul, Rongchii/April 10 (Agencies): North Korea-i hadir tasen aika tendanga tensa mejungi akümba mapang ka nung asa South Korea den tongtepratep masütsü atema jenjang agiba reprangtetogo aser US den military drill ayongzüka agiba atema kidanger linük ya "puppet traitor" ka ta shiogo.

South Korea indang Unification Ministry-i Hombarnü ashiba agi, inter-Korean liaison communications channel ajanga linük ana tongtepratepa aruogo, ajisüaka North-i anogo pezübuba atonga call asüba magizüker. Linük ana tsüingda Hombarn nungi Hokolbarnü tashi anepdang 9 nungi nikongtsütsü 5 ako tsüingda tongtepratepa arudar.

"Pyongyang-i osang kecha magütsüi tesendaktep raksatsü asoshi merangba ama reprangteter," ta otongdar Koo Byoung-sam-i osangbenertem

dang ashi. Paisa, 2021 küm October ita sülen tang mezüingbuba inter-Korean military lines mesüra liaison call tem tang mezüingbuba anogo ka dak tema mesüteti arudar.

Korea linük ana ya tang tashi rara nung lir aser linük ana tsüingda regular phone service mali. Arrtsü nung mangatettep aliba tajemba kümdaktsütsü nükjidong nung sensaksem aiba akaba sülen 2018 küm parnoki iba hotline ya amenoka liasü. Ajisüaka North Korea-i parnok mepelaba sayua taoba mapang nunga tongtepratep mesüi aruogo.

"US aser South Korea nati exercise balala ayongzüka agiba atema parnok mepelaba sayutsü atema iba telangzüba agütsür asütsü ta amanger," ta Asan Institute for Policy Studies nungi senior fellow Go Myong-hyun-i ashi.

"Iba ajanga tensabo

tamajungba makümtsü ta bilemer, saka South Korea aser US nati military drills balala ayongzüka agiba atema telangzüba ka agütsüba ama reprangteter," ta Go-isa shisem.

US, Japan aser South Korea-i iba ita South Korean kübok Jeju asetkong temeket tzüym nung anti-submarine drills ka ayongzüka agiogo. North Korea-i, US aser parnok tembar "puppet state" temi parnok sasa parnok lendongi aitsü atema inyaksangshir ta tekumdangtsü metetdaksüba den mashi mapang ka nung amshitsü atema nuclear hadirtem renema lir ta ashi.

Kim Jong Un-i aniba sorkari item drill tem ayongzüka agiba anema telangzüba tapet agütsütsü tenangzükba agütsüogo aser US aser parnok den sendaktepa aliba linük ana dak nuclear khaloktsütsü atema design süa

yangluba hadir tasen sayaogo. Telangzüba agütsüba nung taoba ita aser iba ita "Haeil" ta nungja agütsür tzü telung nung amshiba drone tasen ka tendangogo. North-i ashiba agi iba yagi "radioactive tsunami" ka adokdaksütettsü, ajisüaka South Korea indang military-i iba dak tamang makar.

"Tashi sayutsü atema tsükchirtemi military exercises balala ayongzüka agiba ajanga North amaktsü atema jelia renemshiba sayur aser iba ya teka sükleper dangbo repranga matatettsü," ta North nung osang kaket tulutiba Rodong Sinmun sangdong ka ajanga metetdaksü.

South Korea nunger activist temi Kim yimsütsüba anema arrtsü aden ballon nung leaflet tem yokba sülen North Korea-i küm ka shi inter-Korean hotline ya shibanga toktsü ajisüaka 2021 küm July ita tenzükshia liasü. Ajisüaka hopta ishika dang lir military

drills ayongzüka agiba atema Pyongyang mepelai ano ita anashi iba line shibanga toktsü.

2022 küma June ita North Korea-i hotline ajanga call asüba ka magizük, ajisüaka iba yabo tzüinglu aruba ajanga technical timtem kar adokba ajanga liasü.

"Tang tasüingdangba ka ji taoba mapang ama mapang tatakzüka ka atema iba ya khen asoshi longkak aitba dang asü inyakyim melenshitsü atema mezüingbuba jenjang agiba ka," ta Vienna-based Open Nuclear Network, regional issues manager Rachel Minyoung Lee-i ashi.

"North Korea-i tawa Korean Peninsula nung tensa indang osang tesashi kar agütsüogo aser iba ajanga foreign policy nung tongtibang telemtetba kar agiba temaitsü sayur," ta Lee-i ashi, shiba CIA indang Open Source Enterprise nung analyst ka ama küm metsü shi inyakogo.

4 buba Mkg Town Inter-Ward Football Tournament 2023 tenzükogo



4th Mkg Town Inter-ward football tournament yangi Imkongmeren Sports Complex nung April 10 nü mezüng asaya Arkong ward o Mongsenbai ward na asayaba mapang tangokba noksa nung angur. Mokokchung, 10th April, 2023.

Mokokchung, Rongchii/ April 10 (TYO): 4 buba Mokokchung Town Inter-Ward Football Tournament 2023 April 10 nü yangi Imkongmeren Sports Complex, Mokokchung nung meraketa tenzükogo.

Iba asayamung ya Marepkong Youth Association-i Mokokchung town nung lanur football jangrartem nem sabang lapoktsüba den sempet aketertem ajungkettsütsü nükjidong yur 'Towards Excellence' omen nung

ajemdaker taküm agi küm 4 buba ayongzüka akar.

Taküm iba asayamung tenzüktsür Mokokchung Division Forest Officer, Dr. Sentitula IFS-i jembidang, tajungtiba jenjang ka tongtettsü asoshi meranga inyakba den bendanga agütsütsü nungdaker ta asayartem ajungshia liasü.

Asenoki dang merangra aser tokolok shitak amshitetra, asen jakdang maong aika lir, ta lai ashi. Asenok nem temoatsü aika den khuret balala agüja lir,

aji asünung, kodang asenoki item khuretji koktetdir, idangjiang asenoki temoatsütemji agiteter, ta laisa shisem.

Asayamung tenzükä mezüng asaya Arkong ward o Mongsenbai ward na asayaba Mongsenbai-i goal 3-0 agi Arkong madak takok angu.

Taküm iba asayamung nung Mokokchung town kübok ward 13-i shilem agitsü. Pool 'A' nung - Mongsenbai, Arkong & Marepkong ata-a lir. Pool 'B' nung - Dilong, Penli, Alempang aser Artang ward. Pool 'C' nung - Lijaba Lijen, Majakong aser Kumlong aser Pool 'D' nung - Sangtemla, Yimyu & Tongdentsuyong ward-tem ata-a lir.

Final match April 21, 2023 nü asayatsü. Taküma iba asayamung shir ward-i bendir champion nem senpet sen 50,000/- aser runner-up nem sen 30,000/- senpettsütsü. Iba den nija senpeta kar agütsütsü, tayongertem terenemba lir.

April 11 nü mezüng asayamung nikong 1:00 ako nungi LijabaLijen Ward o Majakong Ward na aser tanabuba asaya 2:30 PM nungi Sangtemla Ward o Yimyu Ward na asayatsü.

Asian Wrestling Championships: Rupin, Neeraj, Kumar nungeri medal angu

Rongchii/April 10, 2023 (Agencies): Deobarnü Asian Wrestling Championships nung lanur asayar Rupin-i 55kg Greco Roman asaya nung silver medal nguogo. Iba ya pa atema senior-level international medal mezüngbuba lir.

Arishi küm 19 tain Rupin-i silver medal anguba den kasa anogo Neeraj (63kg GR) aser Sunil Kumar (87kg GR) natia bronze medal ngua liasü.

Final asaya nung Rupin-i 10-3 agi Iran nunger asayar Poya Soulat Dad Marz mekoki liasü. Pa qualification round nungi tenzükä asaya asem atonga akokba sülen final tongteta liasü.

Rupin shibai 2019 küm World Cadet Championships

nung bronze medal ngua liasü, pa iba asayamung nung mezüngbuba asaya qualification round nung Kyrgyzstan nunger asayar Sardarbek den asaya aser pai 16-7 agi iba asaya koka liasü.

Iba sülen pai quarterfinals aser semifinals nung Kazakhstan nunger asayar Amangali Rahimbayev aser China nunger asayar Zhang Haifeng na koka liasü.

63 kg category asaya nung Neeraj-i South Korea nunger asayar Jinseub Song 5-2 agi koka bronze medal angu aser kasa mapang nung Sunil Kumar-i 87kg category nung Japan nunger asayar Masato Sumi 4-1 agi koka bronze medal ngua liasü.

Qualification round nung Neeraj-i Kyrgyzstan nunger asayar Dastan Kadyrov 7-6 agi akok, Quarterfinal nung pa Iran nunger asayar Imam Hossein Khoon Mohammadi 0-9 agi koka liasü, ajisüaka Mohammadi final-i aiba ajanga repechage ajanga pa tanaben asayatsü atema maongka ngua liasü.

Iba sülen India nunger asayar yagi iba maongka kanga junga agia bronze medal atema asaya nung Song koka liasü.

Sunil Kumar shibai taoba mapang Asian Championships nung gold medal ngua lir, pai quarterfinals nung Tajikistan nunger asayar Aslamov 9-1 agi ayong ayonga koka asayamung tenzükä liasü.

Pakistan-i India ama Russia dang totzö...

(Tapak 7 nungi...)

Pakistan ya rongsenketzüng tsütsü timtem tulu ajurua lir aser International Monetary Fund (IMF) aser tembar linüktem nungi sen aputsü meranger.

China-i sorkar meyong China Development Bank ajanga February ita sen million \$700 apuja liasü aser March ita ano China nungi sen billion \$1.3 apu ta Pakistan-i shia liasü.

Ajisüaka par linük nung yimtenren tsütsü tajangzük angutsü mechi Imran Khan-i maneni India tenüng sanga liasü. Taoba mapanga pai anaben India tenüng sanga liasü.

"Nawaz dak alaka lenir shinga aliba nung sen billion aika jenjang rongsen mali. Ato kilonser mesüra lenir shiba danga linük nung sen billion jenjang rongsen ali. Asen kidanger linük nunga PM Modi rongsen kwi India alema oa ali?" ta Imran Khan-i 2022 küm September ita shia liasü.

"Quad nung shilem ka süaka US-i ashiba manga India-i par nübur yaritsü asoshi Russia nungi jenjang talang agi totzö ali. Asen sorkari independent foreign policy ka ajanga yamaji inyaksü meranga liasü," ta

Imran Khan-i taoba küm May ita ashi aser par sorkar matsüngdok asübo kasa meraji agitsü liasü ta tuteta ashi.

Pakistan sorkar dang election agitsü ajungshia jembidang, pa bukumer temi yimtung nung longkak ait tenzüktsü, ta Khan-i ashi.

"Nisung kari ni lenmang nungi agientsü merang. Item nisungtem yagi Murtaza Bhutto ama tepsetnü. Ni tepuokdak ayunungbo ni tali nungtugu akumtsü ta parnoki tsübo ba bilem, anungji parnoki ni tepsetnü," ta pai ashi.

Vinesh Phogat WFI OC aitsü

Rongchii/April 10, 2023 (Agencies): India tsürtem rongnungi nungtugu wrestler Vinesh Phogat-i, taoba WFI tekolakba aser BJP züngsem Brijbhushan Sharan Singh anema tashishiba (sexual harassment) benokba bushisüngdangtsü atema Oversight Committee tentettsüba dak tamang makai kümogo, ta ashi.

Phogat-i ashiba agi, lai sports minister, Anurag Thakur aser oversight committee tekolak MC Mary Kom dangi call asüba dena telangzüba magütsü.

"Oversight Committee-i ngutetbatem kechiba meimshir aser ken o bushisüngdangba osang tejangja magütsü," ta Phogat-i ashi.

"Tetsür wrestler temi parnok tajangshiba kanga tasü ita jembio, saka parnok o ya kecha tagidak mali ama bilemer. Onoki ken o tongtibang ka benokogo, koba tetsür wrestler kümzüka toktsütsü atema lir. Onoki committee dak tamang makar," ta lai ashi.

Phogat-isa, oversight committee-i tenangzükba agütsüba mataloktsüba indang jembia liasü.

"Sorkari tenangzükba kar agütsü ajisüaka item ya atalokja

mali. Committee-i benokba report indanga onoki mejangja. Onoki asüngdangba shia shingaa telangzüba magütsü," ta Phogat-i ashi.

Phogat-isa, la aser wrestler Bajrang Punia nati oversight committee den tongteprateptsü meranger saka kecha telangzüba magütsü, ta ashi.

"Onoki sports minister Anurag Thakur den jembitsü merangdangogo, saka pai kecha telangzüba magütsü. Ni anaben asemen ka merangdangogo aser Bajrang-ia merangdangogo. Onoki Mary Kom densema committee züngsemtem den jembitsü merangdangogo. Laia onok indang call magizük. Onok nem ochi obendang shibai agütsütsü aji mejangja," ta Phogat-i ashi.

Phogat-i ashiba agi, oversight committee-i ngutetbatem lokti nem memetdaksüra mesüra wrestler temi kuli agütsüba süoki ia magira wrestler tem atema tanga lenmang kecha mali saka okadak ken o benoktsüba dang anunga lir.

"Onok atema tanga lenmang kecha mali aser ochi obendang atema okadak raratsüba dang anunga lir. Ken o nungi atsüngzüka aotsü asoshi kecha tebilemba mali," ta phogat-i shisem.

Ons Jabeur-i Charleston Open kokogo

Rongchii/April 10, 2023 (Agencies): World number 5 asayar Ons Jabeur-i Charleston Open final nung Belinda Bencic madak takok ngua taküm mezüngbuba asayamung kokogo.

Tunisia tsür Jabeur, shiba 2022 küm Wimbledon aser US Open nung runner-up liasü lai Swiss tsürla ya 7-6 (8-6) 6-4 agi koka liasü.

Jessica Pegula den semifinal asayaba mapang tzünglu aruba ajanga Honibarnü asaya tembanga masayatetba sülen Defending champion Bencic ya Deobarnü asaya ana asaya liasü.

Iba asayamung akokba densema Jabeur-i WTA title pezü benokogo, kong clay court nung asayamung ana akokba densema lir.

Jabeur taküm küm junga asaya metenzükter aser January ita Australian Open tanabuba round nung yiruba sülen junga masayateti aruogo.

Ajisüaka final asaya mezüngbuba set nung la game ka tesülen aliba nungi meyipa arur asaya akok aser tanabuba set nunga asaya dak maneni

rangloker asaya-i lai iba asaya koka liasü.

2020 season nungi tang tashi nung lai clay-court nung asaya 37 kokogo, koba iba küm tsüngda WTA Tour nung asayar kati asaya timtiba akokba asütsü.

Kasa mapang nung world number five asayar Casper Ruud-i Miomir Kecmanovic madak takok ngua Estoril Open kokogo, koba pa atema taküm mezüngbuba title asütsü.

World number five asayar yagi mezüngbuba set nungbo game pongu atonga koka ayong ayonga akok ajisüaka tanabuba set nungbo Kecmanovic-i kanga junga asaya-a tena tie-break asayatsüsa aküm.

Ajisüaka arishi küm 24 tain Norway nunger asayar yagi asaya 6-1 7-6 (7-3) agi koka liasü.

Iba asayamung makok tsüngda taoba küm French Open aser US Open runner-up asayar yagi 2023 küm asaya 11 nungi pongu dang koker liasü.

Ajisüaka iba asayamung akokba sülen Ruud ATP rankings nung jenjang pezüubai atutsü.

BILEMDANGANG

"Shisakar den sensaksemba ajanga temulung akasor,"